

### L3G, 23

[ANDRA MARIXA MARTIKO]

Andra Marixa Martiko  
artian udia tatiko  
handik aurrera betiko”.

*(Arantzazuko esaera zaharra)*

Andra Marixa Martiko dugu  
Udaberriko sarreran  
festa hortatik uda segur da  
aintzinako esaeran;  
kukua entzun espero nuen  
jaiegunaren sorreran;  
aurten, ostera, ez zen kukurik,  
elurtetik bai aukeran.

Mateotxistu, zakur taldeaz,  
uluka. dabil haizean;  
arantzabeltzen lore zuria  
elurrak dauka menpean  
orban gabeko hil-izara du  
zabaldu hotzak lurrean;  
txoriak ixil, Mateotxistu.  
hor ari bait da ehizean.

Belar berriak, loreak, susak,  
izotz-estalkiz gaisoak,  
jaio orduko zigortu ditu  
ekaitz beltzaren besoak;  
hala-ta ere lurmenduko du,  
ezin du etsi Martxoak,  
garaipenaren dizdira hor du  
ehoz dakarren pazkoak.

Alferrik dabil Mateotxistu,  
alfer alferrik ekaitza,  
Udaberriak ez bait du jango  
jada eman digun hitza;  
behin honez gero hain du betea  
arnasa berri bortitza,  
elur azpian agurtzen dut nik  
erne-indar den bizitza.

1983 - martxoa